

19. *Oncotylus Horvathi* Reut.

Diagn.: Virescenti-flavus, superne sat dense nigro-setosus, setis hemielytrorum adpressis, antennis dense nigro-pubescentibus, maris fuscis, articulo primo secundoque versus basin sordide flavo-virescentibus, illo ante apicem annulo angusto fusco saltem inferne distincto, articulo secundo margine basali pronoti fere $\frac{1}{4}$ longiore, duobus ultimis secundo paullo brevioribus, quarto tertio circiter $\frac{4}{7}$ brevior; pedibus colore corporis, nigro-pubescentibus, femoribus inferne bi- vel tri-seriatim fusco-maculatis, inter maculas atomis fuscis adpersis, tibiis spinulis longis nigris e punctis minutis nigris nascentibus, apice tibiarum tarsisque nigris; hemielytris dimidio apicali clavi, corio anguloque interiore cunei minute sat dense fusco-punctatis, corio basi lateribusque late inpunctatis, apice interne nebula infuscata; membrana fumata, venis flaventibus, vitta longitudinali dimidii basali circa venam brachialem pallida; capite maris ab antico viso latitudini fere aequae longo; aroliis totis cum unguiculis connexis. Long. ♂ $5\frac{4}{5}$ mm.

Hab. in Armenia rossica, D. Leder (Mus. Hung.).

Descr.: Ab *O. punctipede* Reut., cui colore corporis et pedum sat similis, antennis longioribus, aliter constructis et coloratis, capite ab antico viso haud transverso, vertice angustiore, hemielytris ad maximam partem fuscescenti-punctatis, aroliis cum unguiculis totis connexis etc. bene distinctus. Caput (♂) basi pronoti duplo angustius, a latere visum altitudine basali longius, genis mediocribus, gula horizontali, peristomio parum brevior, angulo vix magis quam dimidio latiore. Oculi virescentes. Rostrum articulo primo basin capitis vix superante. Antennae articulo secundo lineari, longo. Pronotum basi longitudine minus quam duplo latiore, apice longitudine angustiore, lateribus rectis, callis optime discretis.